

**UCAPAN PERDANA MENTERI, SELAKU PRESIDEN
UMNO MALAYSIA DI PEMBUKAAN RASMI MESYUARAT
PERWAKILAN UMNO BAHAGIAN SRI GADING,
DI SEKOLAH MENENGAH TUN ISMAIL, PARIT RAJA,
BATU PAHAT, JOHOR, PADA 19 MEI 1979.**

Saya bersyukur kehadiran Allah Subhanahu Wataala kerana dengan limpah kurnia dan izinNya dapat saya bersama-sama hadir di Mesyuarat Perwakilan UMNO Bahagian Sri Gading yang ke lima pagi ini dan seterusnya merasmikan pembukaannya. Saya mengucapkan terimakasih serta setinggi-tinggi penghargaan kepada ahli-ahli Jawatankuasa UMNO Bahagian Sri Gading khususnya kepada Dato Haji Yusak kerana memberi penghormatan ini kepada saya.

Saya juga mengambil kesempatan ini mengucapkan berbanyak terimakasih serta setinggi-tinggi penghargaan setiap pemimpin dan ahli UMNO di seluruh Bahagian Sri Gading di atas peranan mereka masing-masing dalam menjalankan kempen Pilihanraya Umum tahun lalu. Hasil keputusan ketiga-tiga calon Barisan Nasional yang bertanding di bahagian ini membuktikan bahawa pengaruh UMNO tetap kuat dan rakyat jelata khususnya orang-orang Melayu mempunyai penuh kepercayaan dan keyakinan kepada parti dan pucuk pimpinan di peringkat Cawangan, Bahagian, Negeri dan Kebangsaan.

Sewajarnya kita semua menjunjung tinggi serta menghargai kepercayaan, keyakinan dan sokongan rakyat sekalian. Sebagai balasan setiap pemimpin dan ahli UMNO hendaklah mencurahkan khidmat bakti mereka serta menyumbangkan tenaga dengan jujur dan ikhlas dalam memajukan lagi masyarakat kita, terutama penduduk-penduduk kampung dan kawasan-kawasan pedalaman, saya sendiri menyedari dan menginsafi dengan keadaan yang daif, yang masih lagi terdapat di kebanyakan kawasan dan kampung-kampung bukan sahaja di Bahagian ini bahkan di negeri-negeri yang kurang maju. Kerajaan telah pun menjalankan berbagai langkah serta melaksanakan bermacam-macam projek dan rancangan sejak tahun-tahun enam puluhan. Kemudahan dan faedahnya telahpun dapat dinikmati oleh sebilangan besar rakyat dan penduduk di tanahair. Sungguhpun begitu, memang banyak lagi yang perlu dilakukan terutama di kampung-kampung dan kawasan yang saya sebutkan tadi, supaya kemajuan dari rancangan-rancangan pembangunan kerajaan ini dapat dinikmati oleh setiap rakyat dan penduduk dengan lebih adil lagi.

Menyedari di atas hakikat inilah, bertambah pula dengan kedudukan kewangan negara yang baik, maka dalam Kajian Separuh Penggal, kerajaan telah meluluskan peruntukan tambahan, menjadikan jumlah peruntukan Rancangan Malaysia Ketiga sebanyak \$32.1 ribu juta atau 75 peratus lebih tinggi dari peruntukan asal sebanyak \$18.6 ribu juta. Sebahagian besar dari peruntukan tambahan ini iaitu sebanyak \$11.2 ribu juta atau 56 peratus adalah membasmi kemiskinan.

Bidang pertanian dan pembangunan luar bandar terus mendapat bahagian yang terbesar. Tujuannya ialah bagi mempercepatkan lagi pembasmian kemiskinan di dalam dan di luar bandar dengan meningkatkan daya pengeluaran serta menambah peluang golongan yang miskin dan yang berpendapatan rendah, menggunakan aset yang produktif. Program-program ini meliputi pembangunan tanah, pelajaran rendah dan menengah, perumahan murah, jalan luar bandar, perkhidmatan perubatan dan kesihatan, bekalan letrik luar bandar serta bekalan air.

Tiap-tiap negeri menerima tambahan peruntukan masing-masing di bawah Kajian Separuh Penggal ini. Negeri Johor diberi peruntukan tambahan sebanyak \$519.07 juta, menjadikan jumlah peruntukannya bagi Rancangan Malaysia Ketiga kepada sebanyak \$1,974.6 juta berbanding dengan peruntukan asal sebanyak \$1,455.53 juta. Pertambahan perbelanjaan di bawah Kajian Separuh Penggal ini adalah besar dan kerajaan akan menentukan supaya faedahnya diterima dan dinikmati oleh seluruh rakyat jelata.

Kita mestilah ingat bahawa kejayaan usaha-usaha kerajaan ini bergantung kepada kerjasama dan penyertaan serta penglibatan sepenuhnya oleh rakyat. Inilah yang mesti kita jelaskan kepada setiap rakyat dan penduduk, khususnya orang-orang Melayu. Dengan jalan ini maka usaha-usaha baik yang dilaksanakan oleh kerajaan itu dapat membawa kesan yang lebih bermakna kepada mereka, mendatangkan keuntungan kepada mereka sendiri, serta memberi munafaat kepada mereka dan anak-cucu mereka di kemudian hari kelak. Inilah penerangan yang patut kita semua sampaikan dan jelaskan kepada seluruh rakyat. Mereka hendaklah benar-benar memahami hakikat ini serta mengamalkan usaha-usaha yang berfaedah ini demi kepentingan masa depan mereka serta menjamin masa depan negara.

Oleh kerana tanah merupakan harta penting dan bernilai, maka rakyat dan penduduk di kampung hendaklah memaju dan mengusahakannya secara bersungguh-sungguh supaya ia dapat mengeluarkan hasil

yang produktif. Kerajaan akan terus memberi tanah kepada rakyat yang tidak bertanah, dengan meluaskan rancangan-rancangan tanah yang ada atau melalui pembukaan rancangan-rancangan tanah baru. Kerajaan juga akan terus memberi bantuan-bantuan serta khidmat nasihat kepada petani-petani dan pemilik-pemilik tanah serta mengadakan berbagai kemudahan sosio-ekonomi yang lain dengan hasrat supaya setiap orang dalam sektor pertanian ini dapat menikmati keadaan hidup yang lebih sempurna.

Saya bersyukur kepada Allah kerana sungguh bertuah dapat mewakili rakyat dan penduduk kawasan Sri Gading. Saya berazam untuk memajukan kawasan ini serta meningkatkan kemajuan petani dan penduduk Bahagian Sri Gading ini. Sekalipun tanggungjawab saya banyak, saya sentiasa meluangkan masa memikirkan cara mana dan bagaimana saya dapat mencurahkan khidmat bakti kepada penduduk-penduduk di kawasan ini. Saya amat terhutang budi dengan rakyat di sini yang telah memberikan kepercayaan, keyakinan dan sokongan kepada saya. Saya menjunjung tinggi di atas bantuan tenaga dan usaha, ahli-ahli Jawatankuasa Bahagian dan Cawangan-cawangan UMNO yang telah menunaikan tugas dan kewajipan mereka serta meringankan beban dan tanggungjawab saya selama ini.

Sokongan dan kerjasama yang saya terima dari pemimpin dan ahli-ahli UMNO dan lain-lain parti anggota Barisan Nasional, menyebabkan saya sentiasa sedar di atas kewajipan dan tanggungjawab saya. Saya tidak akan mengabaikannya dan akan berusaha dengan sedaya-upaya saya memenuhi harapan tinggi rakyat itu. Saya harap pemimpin dan ahli-ahli UMNO khasnya dan rakyat serta penduduk kawasan Sri Gading ini amnya, dan juga di seluruh tanahair, akan terus memberikan sokongan dan kerjasama ini, bagi membolehkan saya menunaikan dan menyempurnakan tugas, peranan, tanggungjawab dan kewajipan saya dengan lebih licin dan teratur.

Sebagaimana yang pernah saya nyatakan dahulu bahawa tugas utama saya ialah hendak membina masa depan negara yang lebih terjamin serta memastikan perpaduan dan keutuhan yang berkekalan di kalangan rakyat berbilang kaum. Pesanan saya sebentar tadi ialah supaya setiap kita berusaha untuk memajukan diri kita sendiri, dan seterusnya memajukan masyarakat, bangsa dan negara. Saya telah juga menekankan mengenai penyertaan dan penglibatan rakyat dalam pembangunan. Saya tidak akan jemu menyuarakan perkara ini berkali-kali kerana saya memang berkehendakkan serta suka melihat supaya rakyat dan penduduk di negara ini, semuanya maju, makmur serta hidup dalam aman

dan sejahtera. Saya harap UMNO Bahagian Sri Gading dapat memelopori hasrat dan cita-cita suci ini. Inilah contoh yang baik yang dapat kita tunjukkan agar ia boleh dijadikan panduan.

Bagi membantu supaya matlamat ini tercapai setiap kita hendaklah sentiasa mengkaji serta meneliti isi kandungan Manifesto Barisan Nasional yang merupakan janji kita kepada rakyat. Manifesto ini adalah panduan kita dalam menjalankan kegiatan dan usaha parti kita selama jangkamasa lima tahun ini. Kita tidak boleh dan tidak akan lari daripada janji-janji yang telah kita buat itu. Dengan seberapa daya-upaya, kita akan cuba menunaikan segala janji-janji itu.

UMNO memanglah sudah sehati dengan jiwa sebilangan besar rakyat. Parti kita mempunyai pengaruh yang telahpun berakar-umbi. Kejayaan cemerlang parti kita di masa-masa yang lampau telah mengukuhkan pengaruh kita di kalangan rakyat. Kita percaya pengaruh ini tidak akan merosot oleh kerana kita mempunyai keupayaan dan kemampuan untuk mengendalikan urusan parti dengan licin, menyelenggarakan pentadbiran negara dengan sempurna, dan menjayakan pelaksanaan rancangan dan projek pembangunan. Tetapi sebagai parti politik yang tertua dan terbesar di tanahair, kita patut mengkaji kedudukan kita dan pengaruh parti kita dari masa ke semasa. Dengan jalan ini maka dapatlah parti kita mengekal dan seterusnya meningkatkan pengaruhnya di kalangan rakyat negara ini.

Mempengaruhi pemikiran rakyat bukanlah satu perkara yang mudah. Ia tidak dapat diperolehi dengan wang ringgit. Pengaruh yang telah hilang atau merosot, tidak mudah ditebus kembali. Oleh itu, kita mestilah berikhtiar dan cuba membaharui cara-cara yang sesuai bagi mengekal dan meningkatkan pengaruh. Ini mestilah dilakukan dari peringkat cawangan lagi.

Pada hemat saya adalah wajar, jika pada tahun-tahun selepas pilihanraya ini, kita mengamalkan sikap yang berorientasikan pembangunan. Di samping menjalankan kegiatan-kegiatan politik, kita patutlah menumpukan tenaga dan pemikiran ke arah meninggikan taraf ekonomi rakyat serta membaiki keadaan hidup penduduk-penduduk kampung kita. Kita mestilah membuat perancangan jangka panjang dan pendek bagi memenuhi keperluan rakyat.

Keupayaan dan kesanggupan kita melaksanakan tanggungjawab inilah yang kelak akan dijadikan ukuran oleh rakyat, samada atau tidak mereka dapat terus memberikan kepercayaan dan keyakinan kepada

parti kita. Ini adalah tugas yang penting yang mesti difahami dan dijalankan oleh setiap pemimpin, baik Wakil Rakyat atau pun pemimpin-pemimpin biasa di Cawangan.

Saya harap setiap cawangan dan Bahagian UMNO seluruh tanahair dapat memberi perhatian yang berat di atas perkara ini. Kegagalan kita dalam usaha ini akan mengakibatkan kekecewaan rakyat. Ini sudah tentu, pada akhirnya, menjejaskan pengaruh dan kekuatan parti kita.

Dalam hubungan ini, saya telahpun mengarahkan supaya satu pasukan petugas dibentuk bagi mengikuti, mengesan dan meneliti rancangan-rancangan pembangunan di kawasan Sri Gading, serta membuat perancangan baru bagi meningkatkan daya pengeluaran penduduk-penduduk di kawasan ini. Pasukan ini yang terdiri dari wakil-wakil dari berbagai jabatan dan badan-badan berkanun telahpun memulakan tugas mereka. Insya Allah, dengan berkat Tuhan, segala cita-cita ini akan dapat dijadikan kenyataan. Dengan ini, maka rakyat dan penduduk-penduduk di kawasan Sri Gading dapat menikmati kemajuan yang lebih berkesan lagi.

Akhirnya, saya sekali lagi mengucapkan terimakasih dan penghargaan kepada semua pihak yang telah bersama-sama menjalankan mesyuarat perwakilan ini dan juga lawatan saya ke Parit Raja. Semoga Allah memberkati segala usaha suci kita.

Dengan ini saya dengan nama Allah yang maha pemurah lagi amat mengasihani, mengisytiharkan Mesyuarat Perwakilan UMNO Bahagian Sri Gading yang ke lima ini, dibuka dengan rasminya.

Terima kasih.